

春融堂集

春融堂集卷五十三

青浦王昶德甫

墓志一

太子太保大學士謚文襄舒公墓志銘

乾隆丁酉正月

孝聖憲皇后賓天四月

上奉

梓宮安葬

泰東陵大學士舒公扈 蹕以行十九日抵良格莊遭疾

上命醫診治且令公弟侍衛舒臨自都乘遽以來侍疾未至

二十一日公薨

上諭曰大學士舒赫德老成端重練達有爲御極之初卽膺

任使宣猷中外四十餘年前此平定回城懋著勞績嗣於西陲撫輯歸順遠番東省勦捕悖逆匪衆悉心籌畫動合機宜實爲國家得力大臣自簡任綸扉日直內廷兼綜部務勤勞匪懈倚毗良深茲聞溘逝深爲震悼隨賞給陀羅被遣額駙公福隆安帶領侍衛十員往奠茶酒竝著晉封太保入祀賢良祠其任內革職降級之案概予開復所有應得卹典仍著該部察例具奏嗣

上還京親臨奠醑復御製詩章以志哀悼旣而禮臣議上賜祭賜葬如例謚曰文襄公長子今倉場侍郎舒常以參贊大臣統兵征勦金川事戴畱駐四川及是又命馳驛回京治喪於是典禮具舉哀榮備至將以五月十九日葬於望涇先塋而侍郎君具狀來丐爲隧道之銘按狀公少而岐嶷

端敏雍正戊申年十九由監生考試筆帖式引見

世宗憲皇帝改授內閣中書庚戌入南書房隨大學士預辦機密壬子擢內閣侍讀偕鄂文端公爾泰往甘肅經理軍務乙卯擢監察御史

今上二年丁巳擢內閣侍讀學士戊午擢都察院左副都御史是年冬擢兵部侍郎協辦步軍統領庚申

上以盛京國家豐鎬游民聚處日繁非便命公偕將軍暨五部諸臣議奏公請禁海口毋許山東游民私渡先來者編入戶冊以備約束又往例民人開墾荒地十年始升科納賦而旂人限以三年輕重失序請更其例奏入允行丁卯調戶部侍郎戊辰擢都統兼署兵部侍郎三月恭遇

孝賢皇后大事命辦喪儀九月奉旨爲軍機大臣十月

擢兵部尚書十一月調戶部尚書管三庫事十二月 命同
大學士經畧傅公恒征勦金川參贊軍務乙巳三月金川納
款奉 旨優敘加太子太保 御書均式宣猷四字賜之尋
命由川入滇勘視金沙江形勢以籌銅運又 命歸途校
閱湖南北營伍十二月還京庚午 命視浙江海塘工程辛
未從 幸江南浙江癸酉張家馬路潰決黃河直入洪澤中
斷流者數百里

上命公同劉文正公統勲策公楞往治之堵決口恤災黎月
餘事畢

上嘉之先是準噶爾有綽羅斯都爾伯特和碩特土爾扈特
名四衛拉特其輝特部附於都爾伯特厥後土爾扈特竄入
俄羅斯乃以輝特補之傳至噶爾丹跳跟犯塞

聖祖三臨朔漠大殄羣醜凶渠走死迄噶爾丹策凌

世祖憲皇帝遣使經界其地始奉約束及喇嘛達爾札戕其
酋自立所屬散亂而輝特台吉阿睦爾撒納爲達瓦齊畫計
假哈薩克兵襲喇嘛達爾札殺之達瓦齊自立爲汗阿睦爾
撒納遂率所屬及都爾伯特台吉策凌叩關求附且籲借兵
以定準噶爾地

上先命公廉之得其狀而返至是 命公馳往經理公以阿
睦爾撒納新附難信請不與兵而移其妻子就食歸化城
上以請兵不與是疑其貳也移妻子是以爲質也軍營兵力
未齊兩部降衆不下數萬疑而有變事將不可問所辦非是
落公職以閒散在參贊上行走明年乙亥將軍哈公達哈率
兵進發公奉 旨留烏里雅蘇臺偕侍郎兆公惠等籌辦糧

餉駝馬接濟事宜是年伊犁平分準噶爾地四衛拉特各自爲汗駐將軍於伊犁統兵鎮撫之而令各汗入京疑懼因煽其衆中道睦爾撒納旣不得爲總汗且以將入京疑懼因煽其衆中道叛走時其妻子尚在烏里雅蘇臺游牧公聞信偕兆公馳往收其妻子送京師丙子噶爾喀台吉青衮雜卜叛臺站卡倫皆斷會有察哈爾兵數百名方以送羊至公畱之分布各站軍報乃通又以所獲馬數百匹羊萬餘頭冒阿爾泰雪山運赴軍前比至額爾齊斯河哈公兵已絕糧四日矣未幾詔令入覲授鑲黃旂漢軍都統參贊大臣丁丑春同將軍成衮札布等由珠爾土斯進兵回部適所收之準噶爾夷人沙達斯胡瑪斯叛副都統鄂實等陣亡公坐是復革職以兵丁効力贖罪公同兆公取阿克蘇下烏什得旨令公在阿克

蘇料理回人屯種而兆公等以是冬督兵進取葉爾羌賊度官兵深入無繼悉眾以困我軍阿克蘇烏什亦一日數驚時回人王素富自其祖內附封公居哈密久隨征在阿克蘇公廉其可信屬以安輯烏什回人而身居阿克蘇鎮之衆心大定會

上先遣滿洲蒙古兵四千爲駐伊犁用公檄令速赴阿克蘇十一月兵至者二千餘名公帥以先道險遠馬斃往往步行戊寅正月初六日將抵葉爾羌回酋大小和卓木逆戰公督兵奮擊凡八晝夜賊敗遁乃與兆公兵合事聞

上授爲副都統旋授吏部侍郎工部尚書鑲紅旗滿洲都統明年回部遂平

上加恩予世襲雲騎尉又繪象於紫光閣 親製贊詞云白

衣白水聞黑水信安衆進援爵秩重晉蓋謂是也庚辰命
公駐回城定設官授祿賦稅土田之制冬賜紫禁城騎馬
辛巳命尚書永公貴代公公還京調刑部尚書兼都統如
故壬午正月管三庫事是年春南巡命在京總理事務後
以爲常癸未四月兼署工部尚書充殿試讀卷官五月充
經筵講官七月管戶部事十月加太子太保甲申春命
偕裘文達公曰修赴福建審訊海關陋規七月署步軍統領
十二月兼管國子監算學乙酉充國史館總裁官丙戌二
月暫署陝甘總督七月兼署戶部尚書丁亥七月署步軍統
領時緬甸不靖戊子春命以參贊大臣往雲南會陳奏錯
謬革職以副都統銜赴烏什總理回疆事務辛卯夏土爾扈
特來歸初土爾扈特汗阿玉奇投入俄羅斯居於額濟勒河

及阿玉奇曾孫渥巴錫以俄羅斯蔑佛教又苦征調遂挈所部以來衆十餘萬羣言洶洶謂有詭計

上亦慮伊犁將軍伊勒圖一人不能經理 命公往相度機宜公察其無他入奏

上嘉之額濟勒距伊犁萬有餘里渥巴錫自庚寅十月啓行八閱月始抵伊犁之沙拉伯勒界飢疲疾疫斃者枕藉公隨宜措置存活甚衆先令渥巴錫及其台吉入 覲而分居部落於齊爾吉爾哈朗諸地又請先於伊犁所屬蒙古部落借駝馬牛羊數萬俾其字息而發尚都諸牧廠之牲畜以補之又予以地給以籽種撥屯兵教之耕植於是土爾扈特咸得安其生以爲歸 天朝晚也已而俄羅斯邊吏使使問故公令見面折之使者搏顙惕息而去是年

上授爲伊犁將軍十一月授戶部尚書壬辰五月補領侍衛
內大臣八月 命爲武英殿大學士兼刑部尚書還京復充
國史館及清字經館四庫全書館總裁又總理吏部兼管
戶部三庫仍充 經筵講官甲午掌翰林院事兼 日講起
居注官是年秋山東壽張縣逆賊王倫以邪教脅衆殺掠官
吏民人

上遣公統率侍衛官兵以往至則破臨清盡殲其黨王倫自
焚死凡六日賊平降 旨嘉美從優儀敘授 御前大臣
命儒臣撰臨清紀畧以著其事丙申二月定西將軍阿公桂
平金川

上以公運籌帷幄有功依平定準噶爾回部故事圖前後功
臣各五十人公名第四參贊君名第十稽諸往古如雲臺淩

烟未有一人而再登圖繪者至于父子並列尤爲曠古所無時

上稽古右文徵天下秘書異牒條爲四庫藏弄文淵閣命公領閣事世以是益榮之公姓舒穆魯字伯容別字明亭正白旗滿洲人曾祖諱席爾泰理藩院員外郎祖諱徐元夢康熙癸丑進士由翰林院庶吉士歷官太子太傅戶部尚書協辦大學士謚文定考諱席格康熙丁酉副榜貢生以文定公公蔭補工部員外郎以公貴累封光祿大夫刑部尚書妣黃嘉氏繼妣宗室又繼妣棟鄂氏皆封贈一品太夫人公爲黃嘉太夫人所出生於康熙四十九年庚寅十二月初二日距薨之年六十有八初配富察氏繼配宗室子長舒常今官總督倉場侍郎次舒寧以事發往伊犁次舒安先卒孫三某某

某公夙夜在公不事家人生產惟宗室夫人勤儉莊敬以相厥家公薨夫人迎柩於道哀慟深切以五月二十一日卒兩夫人皆合葬於京師東直門外望涇之原昶先事公于軍機房繼又爲秋官之屬辱公知遇甚厚二十年來竊見公誠以居心勤以莅事勝繁肩鉅洪濟艱難根盤節錯世人望而氣阻公獨紆回籌畫鞠躬盡瘁俾於有成及其領閣部也甄綜庶政必躬必親以小心將事以明作圖功使百執事恪恭震動不敢稍有叢脞放廢所謂能任大事知無不爲者非歟公待諸昆弟雍睦無間言在家事贈公及兩太夫人起居必謹居喪哀而盡禮私而不廢公以家庭庸行之常故不著著其關於軍國大事者而系之以詞銘曰

維舒穆魯肇自渾春鍾祥良隅厥氣綢繆允矣太傅行端德

醇名卿碩彥式昌厥門公實繼之如鳳如麟少年通籍簡於
紫宸軍國重政輒以公掄金川之役伊犁之軍公在行間
手闢視氛時或利鈍一以忠肫降夷十萬駝馬千羣公往撫
之若旭之溫弗驚弗駭服我耕屯潢池劇盜弄兵於原公往
剿之若霆之奔毋冤毋濫奠我良氓洸洸戎畧穆穆鴻勛何
天之寵 詔旨璘玢曷不慙遺箕尾云淪 詔祀於祠升以
精禋 詔碑于隧冠以鴻文 恩禮丕懋爲時宗臣功在典
冊名在乾坤我銘幽竊用勗後昆

卹贈光祿寺少卿戶部主事趙君墓志銘

君諱文哲字升之一字璞庵江蘇上海縣人少以穎悟稱年
十九補博士弟子爲工部侍郎夢公麟內閣學士李公因培
所知因是于庠序益有聲乾隆壬午春

上幸江南進詩試 行在 賜舉人授內閣中書舍人癸未
充方畧館纂修官甲申直軍機房大學士劉文正公統勲劉
文定公綸今大學士于公敏中皆嗟異其才戊子秋侍講學
士紀昀中書舍人徐步雲洩兩淮鹽運使盧見曾事君與余
牽連得罪會兵部尚書阿公桂以定邊右副將軍總督雲南
貴州請以余兩人掌書記 詔許之明年三月至騰越州時
大學士忠勇公傅公恒奉 命經畧緬甸七月偕協辦大學
士戶部尚書副將軍果毅阿公里袞由南大金江以西進討
君從之出萬仞關掠猛拱抵老官屯緬地惡多瘴攻壘久之
未克君乃以病還騰越州十一月緬降撤兵阿公里袞已前
卒傅公還 朝君始與余依阿公幕府居二年辛卯五月
上以理藩院尚書溫公福代阿公會四川金川土舍索諾木

襲革布什咱土司戕之噉小金川土舍僧格桑攻鄂克什勢
張甚總督弗能制九月命溫公偕阿公赴蜀討之奏以余
與君行十月至成都復以君爲中書舍人明年壬辰五月余
從阿公由章谷攻達烏君畱溫公所是冬克美諾小金川平
晉君戶部主事又從溫公由空喀進討金川又明年癸巳兵
至木果木攻五閭月弗克六月小金川降者叛與金川合鈔
後路初十日師潰賊邀於險溫公歿君與其難時年四十有
九按故事無驗而死于兵名曰未出未出不得卹兵部員外
郎巴君尼琿以君陣亡報事聞兵部乃議贈光祿寺少卿予
祭葬工部作主躋于昭忠祠命翰林院立傳蔭子一入國子
監讀書期滿以知縣用得旨於是其孤秉淵寓行狀來蜀
且曰不孝將以明年二月奉衣冠歸葬於鄉先君執友惟丈

暨侍講吳丈最親已丐吳丈表於隧矣饒石幽竈惟丈其無辭按狀君曾祖繼舊祖璧監生父紳歲貢生是生君兄弟三人君行二居家以友悌聞娶張氏子五秉淵長也監生次秉冲次學泗次醴源次學海女一適黃某孫二尚幼以某年月葬于某里之某原君于學于文無不通尤以詩詞名天下少幽介及壯機警敏慧善析人情寫物態爲人作進御奏記文字深淺輕重各愜所欲又捷且工以是游諸公閒無不親愛者余與君同郡也弱冠同學同官于朝又以事同譴同從于軍也知君者莫余爲詳乃銘以遺之嗚呼君昔著婣雅堂詩詞皆屬余爲序道其所以工者備矣故不復云銘曰嗚呼古之葬者骨肉返于土也君獨不然飼烏鳶而飽狐兔也結蒲收髮怛孤嫠也嗚呼魂氣無不之也泝江而東乘雲

螭也厥兆螭龜神鬼爲也國殤栖之莫敢或隳也

雲南迤東道錢君墓志銘

君名受穀字黃與一字冲齋浙江秀水人曾祖治祖槃皆不仕槃生烱嘉興縣監生以才名中年應順天鄉試授經於今大學士誠謀英勇阿公後病歿于京師以君貴三代皆封贈如君官君孤貧無以爲家隨母嚴太恭人依世父母以居錢文端公陳羣君宗老也勸之學君遂刻苦自勵補秀水縣學生沈編修昌字督學廣東君往依之編修卒於任復從甘肅謝太守某於安撤轉至肅州逾二十年始歸里乾隆二十二年南巡君以賦上行在得召試賜舉人授內閣中書舍人時英勇公以參贊大臣入爲工部尚書而錢文端公于汝誠以戶部侍郎兼順天府尹方貴盛交口推君常熟蔣

文恪公溥遂延之賓館俾典書記後二年庚辰成進士改庶吉士明年散館授戶部主事兼莞錢法堂君通籍後廉介食貧茹素不異諸生居宣武門外距文恪公第十餘里徒步往來未嘗僦薄笨車也所居矮屋五六椽蘆簾土銚與圖書間雜坐客無羶不惜也既爲曹郎精心吏治尚書兆公惠侍郎安公泰咸稱其勤能二十八年擢員外郎是時天津淀河水積日久淹及田廬兆公奉命治河以君從疏濬半年積水遂涸二十九年京察一等入直軍機處三十年擢郎中充湖南鄉試副考官三十二年擢陝西興漢道是時雲南徼外緬甸跳梁總督楊應琚弗能制

上命承恩毅勇公明瑞爲將軍兼總督討之 陛辭奏請從事 詔以戶部郎中馮光熊吏部員外郎傅顯河南開封道

諾穆親及君參其軍君被命由漢中馳入雲南抵永昌迤
迤東道旋調糧儲道九月明公督師自永昌發君從之出宛
頂撫木邦大鞞蠻結破柵十六踰天生橋入象孔迷失道趨
大山猛籠就糧賊躡之三十二年正月麀於蠻化賊來益衆
事亟明公屬君護案牘先行遂歿於陣君同潰軍入關調迤
西道明年七月定邊右副將軍偕經畧傅公恒復進兵奏君
駐盩達接應糧運暨警報往來連月大雨君日夕在泥淖中
凡五月而竣事師旋又畱君於虎踞關監守關兵且收糧儲
之在各站者又明年二月復署迤東道是時各關尚戒嚴而
總督常駐永昌君亦綜理軍需局事年餘以積勞卒于官君
生康熙五十四年某月日卒乾隆三十七年十月十一日年
五十有八娶某氏子二昌祺昌壽君卒日篋無餘財總督率

其屬賻之乃得貲棺以斂而歸其喪於秀水君長身戍削疎
髯而壯于頄望之蒼然若河朔人奔走四方習於勞勩故其
居官也爬梳繁劇必盡其宜聲色嗜欲之誘一無可動而山
川之險阻風雨之跋涉兵戈之間關轉輾怡然處之每日五
更輒蹋壁背誦少時所習古文詩賦長篇不遺一字迄曉而
止蓋君之不自暇逸如此君與余同 召試同直軍機房又
先後從軍於滇故得君之詳無如余者余以四十一年四月
自蜀還 朝而君之卒踰三年矣昌祺等將以某月日葬君
於秀水縣某原狀來乞銘乃銘曰

少貧而孤厥苦荼也長而經營四方厥顛飭也晚而從我以
大終也其廉吏其志士也矜此勞人信煩寃也

廣西柳州府通判朱君墓志銘

君姓朱氏諱秀文字炳齋先世居紹興後徙於杭祖諱國武
又遷松江之婁縣遂占籍爲縣人考諱鎮籓不仕君讀書恥
習章句旣冠補學宮弟子數試不售以貢入太學年五十循
例出判柳州君之之官也上游初未之奇會獄有疑久不決
君力請辦之由是知君才其後遇有難治者必以付君君因
以少見其長歷攝隆安懷遠永淳三縣養利永康橫州三州
事至則獄必平廢必舉有不可必力爭於上故民樂其來而
悲其去君旣以暮年筮仕而南粵外控絕徼猺獞雜處瘴雨
蠻烟所在蒸結君以上游委任日奉檄馳箚莽中意不自得
乃以捐升同知離任引年乞歸家居二十餘年教其子若孫
咸有成立可謂難矣君生康熙丁丑八月二十有一日卒乾
隆戊戌六月二十有三日年八十有二配夏氏有婦道先君

十有一年卒側室孫氏亦以勤儉能佐君君前遇 覃恩馳
封其祖故兩世贈如君官妣鄔氏王氏贈安人君以子履吉
官遇 覃恩引新例贈文林郎夏氏贈孺人孫氏封太孺人
子四桐樟早殤夏孺人出履吉貴州鎮遠府施秉縣知縣履
祥太學生俱孫太孺人出女子子三人適蔡士杞汪大經王
錫奎孫七人光曜光壁光鼎光鼎光寧光邦光泰女孫五人
余與君同郡而君女夫汪君又常從余游故知君宦跡爲詳
君之沒也越二年庚子十月四日己酉履吉履祥卜葬君于
婁縣三保三區二十五畝北麟圩之新阡復介汪君以牀來
請銘昔曾南豐謂南粵偏遠官者小其官爲不足事故皆傾
搖懈弛不能滌陋俗而馭於治而唐荆川紀蔡克廉謂州佐
操柄所不在其可見者大率緣俗而治不能有殊絕功德加

於細民蓋難於振奮如此今君旣不以遐方鄙陋少自摧挫亦不以冗員散職自安坐廢插齒牙矯尾角見其才能使當路用其才在粵十年游攝六州縣事雖以年至自引去而功已有所加於民治已有所見於世然則操柄不在之說果可信耶世之傾搖懈弛自小其官者觀於君可以知奮矣因其孤之請系以銘曰

康寧壽考天所靳羸此縮彼理亦準八桂之林馭蠻蠻云何有才訕卿尹歸與故園耽大隱高朗令終弗替引子孫詵詵眾且允刻石於幽謝菴泯

誥封中憲大夫安徽和州州同知王君墓志銘

乾隆辛丑秋四川松茂道鳳儀遭其母陳太恭人之喪明年壬寅四月扶輓歸里蓋上距其父中憲君之歿十有五年先

是鳳儀免父喪揀發四川由縣令陞成都府知府時王師
進討金川軍事亟不可以假爲辭乃遣其弟耘東歸卜葬中
憲君于太倉州東鄉蘆漕且乞余族兄光祿寺卿鳴盛銘於
幽竈會葬亟未及刻石以藏於是將以某月日奉太恭人合
葬於原而屬余爲志墓之文按中憲公諱述濟字篤驤號益
江王氏自明大學士文肅公錫爵之弟諱鼎爵官河南督學
副使無子而文肅公有子一爲編修諱衡編修亦子一爲太
常寺少卿諱時敏皆不可出爲後及太常公生九子乃以次
子順治乙丑進士贈戶部左侍郎諱揆爲學使公嗣曾孫是
爲君曾祖祖諱原祁康熙庚戌進士戶部左侍郎父諱暮康
熙丙戌進士都察院右副都御史廣東巡撫惟太倉王氏以
右族稱天下科名曾秩遠有代緒迄今二百餘年君纘承前

業勵志刻苦性開敏九歲工屬文十五生母陳氏卒哀戚如
成人請於嫡母孟夫人以命婦服殮夫人許之中丞不許君
固請中丞曰兒勉之他日能樹立得以章服榮而母毋亟亟
也君泣而對曰不敢忘由是益肆力於學雍正四年丙午中
本省鄉試丁未會試中丞爲同考官君以迴避卷中續榜時
命大臣揀選主者以公年少且世家子期以遠大故不入
選尋中丞由少詹事出爲廣東布政使調直隸癸丑巡撫廣
東君皆隨侍乾隆五年庚申冬中丞入京候 旨壬戌得
旨軍臺効力君念中丞逾七十不任塞上寒苦亟馳歸盡斥
其產辦裝過發將侍中丞出塞未至中丞已首塗行四程蒙
恩賜環君亦於是日至遂奉以歸君家世儒素中丞官轍
數徙無長物及罷官寓京師三載又值淮徐歲祲請捐萬金

以助賑君典僦稱貸心力爲竭中丞家居十餘年 恩給三品銜至八十六乃終君左右就養食必備甘脆已則厭其粗糲者將授衣貂貉以時具而身往往衷麤布惟恐中丞聞之歲時伏臘張筵奏樂中丞藉以陶寫不知其家實屢空也九試禮部不第甲戌入都候選歲將除計旬月當選及忽治裝欲歸人怪之君曰吾怵怵焉寢不能帖席其可久於此遂以元旦次日行塗中得家書中丞果有疾至家七日中丞始歿未至前一夕中丞忽謂侍者曰若知之乎吾兒行且歸矣厥明果至人以爲純孝所感戊寅服闋選安徽和州州同知已卯蝗蝻生君揮汗走赤日中率吏民撲捕復禱於神頃之蝗隕如雨墮裘數里害遂息壬午權州事兼攝含山令甲申大水君謁前太守請發社倉穀借諸民太守欲俟牒到君固請

先發如有譴願獨任之既獲請正斗筭飭量人毋以私上下
手民大悅江濱窪下田恃隄爲蓄洩嘗夜過赤林壩值上流
汎溢隄將潰民見君叩請修護君率輿隸伐木起工爲倡民
益奮比明工成隄得以無恙上官檄君理賑務君履勘不少
假或謂何不概以五分例五分不成災君曰輕重何可混乃
審定八九十分以報繼以賑戶過多將議減君力持不可有
不逮賑者捐俸卹之江浦民寓於和者太守欲令歸江浦食
賑江浦復請歸和持不決君請移江浦賑銀至和給之民無
勤而得食是役也勞瘁十閱月竣事民尸祝之乙酉又兼攝
守令含山方借國帑修隄日鳩千百人目營指畫用不虛
靡猾胥罔敢染指州田有江埂歲須畚築而舊籍多混公議
按田數以派埂段令民各書榜爲識更造印冊按籍督修庶

杜混弊事未果行識者惜之丁亥州又被潦君佐荒政如故
戊子奉檄發賑慮民守候黎明卽起料檢日午始飯是日已
詣賑所忽中寒嘔噦歸三日而卒嗚呼和州瀕於大江君在
任凡十餘年無歲不有水患否則修隄築埂日在泥塗畚鍤
中君不以閒曹冗員稍自闕茸辛勤嘔咻至久而益勵卒以
此得疾可謂能勤其職者矣蓋君自以奕世忠孝念 國恩
守庭訓常欲激昂奮勵以紹祖父志不幸老於州佐故不能
盡其才以擴其効然君旣歿而松茂馳驅絕微能以功名自
見受

天子特達之知兩邀 綸綍之寵則君之志雖不及施於身
亦可無憾於九原矣君初封中憲大夫四川成都府知府再
封四川松茂道配陳氏康熙己卯舉人海鹽工部虞衡司主

事邦懷女先封安人晉封太恭人少有賢行初來歸卽遭殆
孟太夫人喪朝夕悲慕擗擋盡禮中丞嘉之在保定時委以
中饋酒漿縞紵內外周洽井井如也中丞罷鎮出塞以暨歸
里其間揜持門戶潔治滌澹太恭人欣助之力爲多及松茂
佐總督幕府時奔走塞外太恭人誠以盡心無懈聞者尤以
爲賢中憲君生某年月日距卒於乾隆戊子某月日年六十
有八太恭人生於康熙某年月日距辛丑某月日年七十九
子八長卽鳳儀次宣次宜次鳳翥次鳳超次宇次審次寵女
八皆適士族孫十人余家距太倉百里而近文肅公以下家
門之華膺文章政事之盛輒能歷歷數之然未嘗以世譜相
質也及余從軍兩金川始識松茂於軍次其後時相過從因
得稔中憲君之孝於親勤勞於職事與夫太恭人之賢及余

還朝而松茂弟宜適在都下時時至余家迫余出按江西
宜在屬下得以非時見益知其家事爲詳然則非予孰當銘
者銘曰

具區之濶實環粵東冲融碧潄浴日廻風是啓太原其光星
虹文章德業旣遂彌隆君繼厥後曰孝曰忠胡屯一第弗邁
於豐曠就一官乃丁鞠誦誰憂昏墊固以坊庸誰呼庚癸飽
以殮饗爰咨爰庶勉德勉功勞臣志士冗散以終匪報之靳
惟後之崇我斲此銘用竢幽宮

湖北布政使朱君墓志銘

湖北布政使朱君一蜚素以政事才幹見稱於世君世家松
江繼遷浙江之嘉善於松江百里而近故立身爲政之方余
得備知其厓畧及余以布政使雲南其子錦昌已爲騰越州

知州曉暢邊事識見英敏人謂君之遺教也故知君行事益
詳乾隆五十六年八月錦昌以書來京師曰某無似先公尚
在淺土而先母又不幸歿矣將奔喪歸而合葬焉敢以志墓
之文爲請按狀君少敏慧年十五補縣學生卽以能文名浙
右入太學名益著會準噶爾逆命用宗人府丞蔡公嵩薦
召見賜金命往陝西軍前効用綏遠大將軍岳鍾琪使赴
鄂爾多斯查檢糧糧器械刻期出師往返四旬而事畢將軍
深異之自是任陝西之高陵麟游韓城臨潼縣事者四又任
直隸之東明臨榆安肅者三任直隸霸州遵化知州者一由
保定府陞清河道任山西直隸湖北布政使者三所至皆有
政績人至今稱之在高陵也遇旱走五十里至驪山龍潭禱
雨雨立降歲以大熟麟游小邑戶不滿萬奉檄令民運糧力

請得免其半在韓城歲災首出俸錢捐紳從之得銀九千兩
赴河南糴米減價以糶周而復始銀盡乃止災不爲害其閒
修學宮講鄉約嚴保甲社倉義學莫不舉行在臨潼清稅賦
葺橫渠書院新之及署霸州掘井千餘以救亢旱爲保定府
建版牖以興水利高公斌蔣公炳皆推重焉而於斷疑獄捕
劇盜尤長麟游有自經於質庫前者君往驗指尖黑兩手掌
青舐之得銅氣君謂是博而負者訊之乃同賭人先與質庫
詬詈有隙適死者負多計無所出因慙之死以詐質庫於是
得白衆驚爲神明潼商道經臨潼被竊盡失其貲時君在省
道令歸而驗之君故以他事辭怒將劾君則君已使捕役伺
諸質庫賊偵事緩以其貨往伺者遂盡獲之東明盜藪河南
劉某爲之魁君廉捕役俞某能給以厚賞先獲其黨股二貲

之使禽劉以自贖民患遂除其機警捷速皆此類也君旣由
道升布政使感激 聖恩不次超擢地方利弊無不設誠而
力行之山西山多田少南藉秦豫北資歸化城餘粟商販不
至民常食貴君念積貯以常平爲重晉省倉穀例貯二百七
十三萬有餘而是時缺額八十五萬三千四百餘石向議以
監生入穀補之穀貴收穀二年不及十之二請仿江南減二
收捐之例得 旨於是民踴躍捐輸倉儲始足值錢貴取庫
存錢配放兵餉又發商領賣錢是以流通歸化城在長城外
民人命盜向令副將同知勘驗復由朔平府審轉君謂勘驗
一官承審又一官何以得實請卽令副將同知審轉民始無
枉縱株累者君骨格開張精神振奮擿奸發伏動中窾要案
牘如山窮日夜讞決不以繁瑣爲嫌在州縣久洞悉情弊奸

胥猾吏不敢上下其手獄有冤濫必請於主獄者全活往往
至百十人性剛直是非可否斷然不可易臨以上官環以大
衆絕無依回洩溺由是忌者思有以中之調湖北布政使旋
以在山西用非其人被議落職得薄譴籍家之日自祖遺田
十二頃外無少增益然後益知君之廉罷官後主潞安府起
文書院山長又一年而卒卒以乾隆二十年六月二十七日
距生康熙四十一年閏六月十一日年五十有四君字健冲
諱某者高祖諱之榮者曾祖也康熙丙子舉人諱岸登者其
考也子三長錫昌監生出爲兄後次卽錦昌次誌昌又次鉞
昌孫二人某某配魏氏明給事中贈太常寺卿大中元孫女
庶吉士學濂曾孫女仁孝儉恕讀書能詩識大義後君二十
四年而卒例封夫人以乾隆五十七年某月某日葬於某縣

之某原銘曰

督姦飭法以息嘖呻謂君明察孰知其仁口講指畫以悉利
病謂君敏練孰知其正位不償德德不永年天實靳之俾昌
後賢隆隆幽竈山盤水繞偕茲藿茀永綏厥兆

春融堂集卷五十三終

春融堂集卷五十四

青浦王昶德甫

志銘

甘肅涼莊道署四川按察使司顧君墓志銘

嘉慶二年閏六月二十六日署四川按察使司顧君卒於家時長子永之在河南會以川楚寇警軍務方亟久之乃得奔喪於是先使其弟湛之來告曰吾兄將歸葬府君於瀆門山之龜頭渚敢以墓志爲請嗚呼余自乾隆二十三年與君定交京師中間離合不一迄于今蓋四十餘年知君生平莫有如余詳者志何忍辭按行述君名光旭字華陽一字晴沙其先本于吳丞相雍至通判潤之始遷無錫及明廣東按察使可久洞陽公始大曾祖敦進士祖懌父建元三代皆以君貴

封贈如其官君少穎悟喜獨居靜坐時有所得乾隆十七年二十一爲邑諸生明年二月壬申恩科鄉試中式八月會試成進士以戶部額外主事用三年實授山東司司主鹽筴兩淮解引課銀庫輒謂不足庫平每百兩挂欠短平銀十五兩歷十餘年欠益多君謂天下所頒之平皆由戶部較準而發若兩淮任意短少何以歷任皆然若由銀庫指爲挂欠卽屬多索白諸堂官衆不能決獨富文忠公聽之遂銷其欠尋擢員外郎二十四年保御史授浙江道監察御史是年直隸山東大水明年正月君上奏曰上年兩省被災荷恩截漕發帑已賑加賑如天之仁無微弗至近見流民扶老挈幼什百人京春來尤甚故五城米廩飯廠人數倍增詢之是近京數百里內被災之民相率逃荒先之毀屋伐樹繼以賣男

鬻女飢羸老弱踣頓不可勝記耳目所及如此其外可知伏思救荒無奇策惟督撫及有司親民之官實心實力方克有濟乃各州縣未嘗不設賑而或委任於佐貳假手於吏胥所設賑或遠離村鎮窮民奔走待食或得或不得凍餒顛斃皆所不免 國家良法美意一入俗吏之手民沾實惠者十不及五卽有一二賢能有司撫循周至而他境流民間風畢集日聚日多轉難措手此督撫不能眞實愛民下亦以應付塞責一切皆屬具文臣請 敕下督撫分飭有司隨地撫綏毋致流移失所去年被淹之地積水未消設法疏導竝可以工代賑然後借給牛具籽種以資耕作倘仍因循侵蝕有流民有曠地卽重治督撫州縣之罪至京城外來飢民已獲赴賑領賑但一年之計全在東作其無力自卹者給

贊遣送其本藉全無倚賴不能回藉卽歸大興宛平作何安輯不致栖流無著并請 敕順天府尹會同五城御史查明人數請 旨遵行抑臣更有請者外省遇有水旱司道府親臨查勘州縣先以伺候供應爲能所委佐貳亦以公館酒席更滋擾累請嗣後大員親臨災地州縣毋許供應亦不得帶同佐貳多攜人役致累災區倘有違者嚴參重處似於荒政亦有裨益奏入

上善之二月 命赴京畿查勘君至文安大城疏積水撫飢民入樂亭境民數萬擁縣門欲斃知縣及悍役王姓者時已昏黑公令老者數人前宣示

上恩特遣御史四路勘災以活爾等性命言至痛切衆哭君亦哭乃令姑退以俟軫卹而乘夜炳燭起草馳章入告乞加

賑次至寶坻灤州盧龍皆如之四月勘畢復 命名見嘉許
良久旋 命赴通州坐糧廳任三十二年擢工科給事中三
十三年二月授寧夏府知府明年調平涼三十五年甘肅大
旱君請開賑而布政使謂有名無實不許君獨清查災戶先
發銀米適布政使以憂去署任爲今直隸總督胡君季堂君
抵省胡君迎謂曰輪蹄鳥道羊腸路溝壑鳩形鵠面人賢二
千石涕泣多矣蓋君口占詩句爲人傳誦而布政使聞之也
按察使畢君沅見君青嵐山詩產破妻孥賤腸枯草木甘歎
曰一字一淚十字千古矣是時隴坂災黎鬻妻子裝木籠于
驢背每籠兩人君命城門記其數五閱月共出六萬七千餘
人則他郡可見也臯蘭各縣聞平涼設粥廠相率就食日以
萬計自上年五月雨至三十六年三月始雨總督明山巡邊

至隆德告君路有饑死者君率縣令請罪總督曰百姓道斃於太守何與君曰知府任地方責烏得辭罪且總督見者一知府見者十知縣見者百鄉長保正見者以千數矣曩知府於路見羣鴉飛鳴樹枝牽挂縷絡則人腐敗之腸也跡而求之澗谷中齒骸堆積綿延不絕是皆地方之責烏得無罪總督悚然慙然問如何而可君曰平涼隆德固原靜寧各有二粥廠飢民日增每廠多至四五萬人天漸熱疫將起知府已造人民住址大小口細冊此時不令歸農秋成何望願給兩月口糧爲歸農資俾得及時布種總督首肯乃具薄笨車數百兩陸續送歸其地時已陞涼莊兵備道而總督以罪免文公綬代之未至先用六百里書約籌災務旣見文公曰河東一路請君任之君曰河東道里遼濶倉庫空虛官吏非本屬

恐呼應不靈未敢任也公曰一切錢糧惟君支取自府以下
惟君調遣某帥以聽誰敢犯子君爲治素有聲旣奉檄罔不
響應遂分八路比戶清查用連三票填注極貧次貧大小口
數一付領賑者持票領賑一貼災戶門首一存本官核對未
領之案晝夜抽查發奸摘伏官吏惕息暨於訖事無敢絲毫
中飽蓋數十年所未有者及秋大熟甘肅民遂以生全時大
兵方討金川土司三十七年文公調任四川總督將偕君行
先奏請加按察使銜君聞不可曰是奏毋乃要君 國家有
事臣子宜効力何以加銜爲總督歎息乃削其藁七月抵成
都時前總督方以誤劄罷君力謀餽遺三路軍營賴以無乏
十二月署按察使先是四川有失業無賴之民好拳勇嗜飲
博掠惡少年爲徒四出劫殺衆莫能制名爲啗曾子至是益

甚君督役搜捕獲之則責以大杖荷以重校反覆喻之以理
咸股慄誓改悔乃令率其侶爲運丁無不踴躍爭先者軍米
因以益裕君常謂天下無飢民無游民則揭竿篝火之盜斷
無從生識者以爲名言時雲南布政使李君湖來蜀協辦軍
需稱之曰江以南有數人物也四十年以秋審失出五案革
職畱川總理糧餉四十一年正月兩金川平大軍奏凱總督
令馳駐西路臥龍關料理回兵兵十餘萬抵關震君威名無
有叫喚需索者時二月風雪如嚴冬君積勞冒寒忽四體麻
木醫治月餘弗效遂告病奉 旨准其回藉乃以七月放舟
過嘉陵江宿坡仙樓士大夫爲君立生祠於樓上君有詩云
密雲不雨下西川身上東吳萬里船多謝漢嘉諸父老不能
載酒侍坡仙蓋其標韻如此既歸年方四十六封君及太夫

人同年六十八而諸子皆得孫君夫婦率子孫牽羈鞠臚上大父母壽進膳承歡晨夕弗懈與與緝緝如也四十二年冬丁外艱又十六年而太夫人歿喪祭盡哀及葬號泣奔走且廬於墓不以五十不致毀稍自寬假又建洞陽公祠竝於祠旁起屋祀始祖及始遷祖與後之以文章名位著者示敬宗收族之誼又取洞陽公廢園所存丈人峯輦寘於祠作拜石山房謂先澤所存弗敢遺也又好葺前賢遺蹟在四川重建漢文翁講堂石室草堂爲杜少陵故址錦江書院在其右君改爲少陵書院并奉其像居家修邵文莊公祠築君子堂又求其墓而識之以歲時祭婦焉生平讓夷急病見義必爲五十年無錫旱君徒跣詣惠山真武廟禱雨其冬捐已田租并捐書院束修助煮賑又經理崇安寺粥廠躬親巡視明年又

捐束修以助展賑書院諸生貧者月給銀米爲助能會每冬
月製寒衣以施爲禦寒會其焦勞經畫與甘肅辦災不殊無
錫自楊文靖公得理學之宗顧端文公依白鹿洞規條建東
林書院高忠憲公攀龍偕吏部華允誠等爲之左右天下歸
依嚮往如五緯麗天芒寒色正明季節義之士咸出其中而
年遠教衰君以清裁令望爲世所推請主書院前後幾十餘
年日與生徒講論道義以踐顧高之緒院中依庸堂下產靈
芝五色嘉善曹徵君庭棟繪爲圖以紀瑞君爲人祥和醇厚
潛于榮利其色莊其言厲雖以吏治見稱而志在扶植忠義
主持風雅金川木果木之變文臣殉難者二十六人 卹典
下君度地於成都建慰忠祠作主以祀屬余撰碑記而自書
之以鐫於石治事暇偕今左都御史學政吳君省欽前湖北

巡撫兵備道查君禮及潼川知府沈君清任邛州知州楊君潮觀曹君焜輒從容譔集賦詩飲酒以爲樂著有響泉等集共若干卷又以無錫東南文藪而賢人淑士湮沒未盡彰網羅詩什人各系以傳成梁溪詩鈔四十八卷書法出入蘭亭聖教尤爲人所寶貴君卒年六十有七配華氏封恭人子三長卽承之乾隆四十二年舉人今官河南陽武縣知縣次卽湛之監生次葆之貢生女三長適同縣監生王相英次適平湖舉人張誠次適太倉舉人畢憲曾孫八等築庠生筠節歲旣簡錢尚幼曾孫一人以某年某月某日葬於鼇頭渚蓋君自築之生礦也君歸里後十餘年余亦蒙 恩致仕其間屢過惠山相見君所以敦勉期望者益重蓋始以文字交而終以道義也昔蘇文忠公撰富鄭公神道碑曾文定撰趙

清獻越州拔藹記庸以示天下傳後世其敘荒政率辭繁而不殺今余亦猶是志也故詳載其大而餘從畧焉併繫以銘
曰

執徐之秋君來東振手相視和而充而晬背益道積躬調宜上壽期願同何哉惡耗遽告終生平之志孝與忠一夫不獲心憂忡直臣循吏兼儒宗溢爲著作光熊熊端文忠憲其遺蹤一堂五世福亦崇允矣端坐還璇穹龜頭吉兆君親封山環水複神靈鍾斑然狸首綬幽宮我斲斯銘殿仁風示萬子孫無終窮

廣西巡撫孫君墓誌銘

我國家撫有方夏溥海內外悉主悉臣覃及西南絕徼莫不奉琛錫貢至其君越萬餘里親赴闕廷鞠臚上壽幸備

期門羽林之末者莫如安南阮惠而廣西巡撫孫君敷揚威德實存以致之蓋安南諸大校莫黎鄭阮諸姓相吞噬久矣先是黎氏殘莫氏而據其國其臣鄭檢尋篡奪阮惠誅鄭并逐黎氏乾隆五十二年黎維祁敝關求內附孫君方奏聞而總督遽請出師踰三江挾維祁至於黎城會春正總督不設備惠悉眾至維祁駭竄官軍隨之入鎮南關時

高宗純皇帝已遣福公康安總督兩粵將議討君密陳曰黎阮相吞噬外夷之常非敢抗一大兵也今維祁不能守其城寇至相率而潰其不足以自立明矣豈宜進討以助之且自鎮南關抵其巢沿瘴海崎嶇瘴癘兵必損粵民久不知兵騷擾徵發必又損于民間安南深懾天威可以折箠使也福勇公然之阮惠果悔罪自陳乞効職貢并請封先遣其從子

光顯入 朝明年恭遇

高宗八十萬壽又入覲既至請用中國冠服

上益嘉之賜名光平禮成而還西裔番王蠻長咤謂是千古所未有也君名永清字宏圖別字春臺少而敏慧受書輒成誦年二十二爲諸生入廣東布政使胡君文伯幕值土司以爭廕襲相訐告驗之皆明時印璽總督將擬以私造符信比叛逆律當斬株連者衆君先私具稿見胡君曰土酋意在承襲無他志豈宜妄以叛逆坐之胡君曰是督撫意且限迫安能倉卒易稿君乃出所具示胡君胡君讀竟大喜陳于督撫從之得活者二百餘人蓋少時固已奇偉矣及從廣東歸兩應 南巡召試皆列二等三十三年戊子順天鄉試舉人明年會試取授內閣中書旋入直軍機房撰擬悉當大學士劉

文正公于文襄公倚如左右手三十八年遷內閣侍讀充方
畧館纂修提調官又充 文淵閣校理四庫館纂修官 鑾
輅時巡恒在扈從常以要事騎而馳

上遙識之曰此軍機處孫某也馳驟若是孰謂南人止能坐
船耶四十四年擢江西道監察御史明年四月遂晉右副都
御史不次之擢蓋異數也是年八月授貴州布政使龍里令
某殘酷劾去之大定府胥役劉某黠悍杖斃之闔境肅然五
年入覲 召對稱 旨旋有巡撫廣西之 命既至劾屬吏
之糾結舞弊號十惡者削職治罪以示於衆廣東饑開常平
倉停採買米價大平廣東人賴以全活奉 旨嘉獎謂深知
大體有古大臣風 御製詩以志之融縣四頂山舊產鉛至
是或言歲久砂薄君訪知煤少非鉛少也聞附近羅城縣有

長安官山煤燬旺移砂就之於是鉛額如故五十二年臺灣
林爽文反調廣西兵合勒君往駐梧州擇勇銳者勞遣之士
氣騰湧臺灣平福公謂是役也得廣西鎗兵之力爲多又慮
梧州地界兩省餘賊或從此竄訶之果獲陳興遠等西寧民
仇德廣邀衆結盟行劫捕獲之廣東官吏將窮治起大獄君
曰結盟行劫有律在矣事株連爲其寬嚴平允又如此然自
安南事起籌糧餉比夫馬督運輜重鉛藥往來瘴地者兩年
心力瘁而受病深矣病亟口授遺奏名諸子勉以讀書承志
語不及私而卒君性仁厚篤於兄弟惠及宗黨工詩文少時
已爲江蘇學政李公因培所器在京師與陸副憲錫熊汪編
修學金爲詩文友著寶殿齋詩八卷皆和平廉直之音君生
於雍正十年七月二十一日卒以乾隆五十五年五月二十

日年五十有七始祖自丹陽遷無錫六世祖繼臯萬歷甲戌
第一甲第一名進士官吏部侍郎歿贈禮部尚書尚書孫仁
溥是爲曾祖祖岱正父廷鏞官山東德州州同三代咸以君
顯贈資政大夫先娶華氏早卒繼娶顧氏以仁孝稱治家惠
而有法先君五年卒子五長爾琦先歿次爾準舉人方以博
學工詩詞名於時次爾拯殤次齡候補國子監典簿次爾曾
尚幼女一適太學生華亮孫三慧詩慧淳慧翼以嘉慶五年
四月二十七日合葬於金匱縣北胡埭之新阡爾準實來請
銘方予自四川歸以鴻臚寺卿與君同直軍機又四年予由
左副都御史按察江西君實補其缺故予二人相得爲最深
初四十二年雲南總督奏緬甸有入貢之信
上命阿文成公莅其事奏以君從旣抵滇貢不卽至

上召公還君曰緬夷震懼已久因前畱守備蘇爾相恐罪重不能自決若警切開導必無不至者公屬君作檄諭之未幾蘇爾相果還而其後按年入貢與安南同蓋君明遠畧熟邊務識夷情洞燭機宜所籌必當其才識有過人者非獨安南一事爲然故牽綴書之以示來裔其他政績甚著不復具書銘曰

治亂持危取昧侮亡國有常經

帝持其綱胡爲夸毗以缺斧斯維相尸之維君匡之止戈爲武來享來王吁嗟星象忽隕南荒契龜食墨其歸其藏後有墮淚弔此崇岡

四川鹽茶道王君墓志銘

余族弟南明之仕于蜀也四十一年而在軍需局者二十有

七年蓋本朝之制各省用兵則總督巡撫必設軍需局主以布政使選道府州縣之明練者預焉凡兵將之徵發糧餉之購貯器械硝藥之製造牛馬之轉輸道途之修治銅鐵布帛之備用將軍大臣之往來開員佐職之選調皆主局者先爲儲倚指示羽檄倉卒朝夕數變亦或勝負得失所關足以驚心動魄故非熟練而有識明幹而有守不足與於此蜀自乾隆三十一年緬甸不靖大軍進討始調川兵又令覓雇驛馬以協馱載至三十四年大小兩金川侵擾鄰境用兵垂六七年迄四十一年而後奏凱尋有科爾喀之役繼又有貴州湖南苗民逆命而湖北白蓮教蔓延陝西以及於蜀故蜀之軍需局歷久而不能撤其間任事者先後升調或緣他故去惟南明一身樁柱其間勾稽案牘料量機宜先事億度從

無絀誤二十餘年中心力蓋盡于是矣南明由監生循例報捐二十五年八月補大竹縣丞越二年調補屏山縣丞三十一年委辦楠木是年六月委駐威寧解送赴滇官兵拉催解牛馬三十三年辦天壇望燈杆木三十五六兩年復辦楠木三十七年陞成都縣知縣三十九年陞簡州知州四十四年陞瀘州知州四十七年陞成都府知府五十二年補授川東道五十五年署布政使 年調全省鹽茶道 年署按察使南明之採木三次也率吏役數千指入蠻地數千里涉巖嶠觸瘴癘所獲皆巨材稱

上意命加二級給賞緞疋及西藏用兵成都將軍率兵進總督駐打箭爐籌糧運而積糧未運至五六十萬總督咨驛召南明乃議徵明正土司曉以大義土司頭目悉踴躍牛馬屬

至不旬日糧悉起運事聞奉 旨嘉獎賜以花翎南明雖屢
擢牧守大吏因其諳練局中藉以爲重急則使之隨營辦事
送兵督運緩則歸局總理一切無從容閑暇之日而南明亦
以孤寒受

上知奮身不顧故卒勞瘁歿於官南明名啓焜又字東白號
秋汀始遷祖富一公爲蘆瀝場鹽官繼爲白牛蕩書院山長
故居楓涇涇北爲江蘇婁縣境南爲浙江嘉善縣境遂爲嘉
善縣人曾祖錫旦候選州同知祖宏澤附貢生本生父桓父
象升皆監生累贈奉直大夫晉贈中憲大夫如其官祖妣妣
及配胡氏皆贈恭人子三莖福建經歷次均皆先歿次登輝
議敘州同孫三長重鈞候選主簿次鍾鈞候選縣丞又次製
錦尚幼女三長適舉人謝昌鑒次許謝某亦先歿三適監生

莊變南明卒以嘉慶三年十月初七日距生於雍正八年四月十二日得年六十有九以五年正月某日偕恭人葬於婁縣秋涇濱之新阡承重孫重鈞等請爲墓志南明與余同出於太原歲久譜軼失其世次而其家楓涇及余家青浦之珠街雖兩省相距僅三十里自少以兄事余南明受業於海寧陳先生焜而余鄉試又出先生本房時令如臯余與南明常在官舍以是益親南明少時長身玉立舉止閑雅時有謝景滌張思曼之目能詩集句最工書仿董華亭蜀中人弄爲墨寶簿書冗雜不忘風雅修杜少陵祠于草堂寺之側又築萍廬於署中及在夔州有三白鶴竝下之異築三鶴堂同人多以詩詠其事時詩人宦于蜀者顧君光旭爲按察使查君禮王君鳳儀先後爲松茂道楊君潮觀曹君焜先後爲知州吳

侍講省欽爲學政每有讌集必招南明在互相吟和又自寫
載酒凌雲冊以志雅尚三十六年十二月予過郛夜已三鼓
矣宿其官齋殘燭熒熒然猶出梁侍講同書所書賢首經摩
挲歎息蓋其清超絕俗如此年六十後使人歸稍葺其故居
又建家祠于涇西置義田五百畝以贍族人將爲歸老之計
其汨沒於軍需中如蠶作繭不能自出豈其志所樂哉重針
等生晚不及知予故掇而書之其亦可感也已銘曰
生山水鄉弗克居也宦山水地弗克娛也軍書旁午手口瘡
也勞人草草卒病以殂也若堂若斧雲波縈紆歸厥幽墟庶
神之愉也

禮部員外郎前四川按察使司孫君墓誌銘

嗚呼是爲禮部員外郎前四川按察使孫君之墓君名嘉樂

字今宜浙江錢唐人高祖某曾祖某祖陳典雍正己酉科鄉試第一歷官陝西鹽驛道父孝培因疾不仕三代皆以君貴封通議大夫如其官君生而敏慧六歲就外傳同學生有誦堯典者聽之卽能成誦塾師驚異以爲不凡乾隆二十年補諸生己卯舉于鄉辛巳成進士分戶部福建司學習專辦井田科井田主旗地時旗田私賣日久輾轉相售糾紛舛錯方命大臣往勘分別回贖文牒焚然見者望而歛手君獨勾稽故籍窮源溯委由分得合并然秩然咸有端緒尚書于文襄公及少司農錢公汝誠異其材倚以爲重二十九年丁內艱旋丁外艱三十三年服闋補山東司主事三十五年陞廣東司員外明年京察一等引見記名外用八月充四川鄉試副考官歸復命奏對四川吏治民情甚悉

上嘉之十二月記名以御史用三十八年陞雲南司郎中明年授雲南學政君既至滇釐正文體訓以讀書行已之要不以邊方荒畧爲嫌士人多感激爭自濯磨三年任滿大學士雲貴總督李公侍堯密奏陳薦及回京補陝西司郎中旋授廣東雷瓊道又調肇羅道蠻俗每歲七夕相傳織女下降死者得仙去婦女多自縊者君嚴禁之其弊始革四十五年陞四川按察使時四川有賊名啞嚙子誘少年剽劫十百爲羣嚴捕置之於法賊皆斂跡四十七年以秋審失出部議降調解任回京補禮部主客司郎中未幾又以失察酉陽州焚搶案降員外郎君以勞瘁得病未補官遂告歸旣歸連主餘姚龍山紹興蕺山諸暨暨陽書院卒于嘉慶五年七月二十六日距生于雍正十一年某月某日得年六十八配馮氏子二

長容年十八能讀書次宸尚幼女六人雲鳳雲鶴皆能誦詩
繪畫餘俱許適士族以某年月日塋于某縣某山之陽客實
來請銘君生平捐潔不苟取與居處飲食終身如儒生在四
川時總督少年侈汰所至必索重賄以是責君君弗應衡之
故其左遷總督與有力焉然歸後以書院束脩自給未嘗有
所介意也君爲余辛巳所取進士劇嗜余所爲詩李公由雲
貴總督罷歸復起而督陝甘過西安酒次嘗諷余雲南諸作
余詫而叩之李公曰此孫學使所刻也君所作昆明湖龍尾
關易羅池諸詩學使皆刻而列於郵亭之壁余往來數見之
故能誦也蓋君之篤于師誼如此今君先逝矣君不克誌余
而余誌君其何忍不銘銘曰

嗟斯人止于斯人尼之命使之我欲指斥將安施君在九原

當知之

山西寧武縣知縣彭君墓志銘

乾隆十八年余與太倉彭君行之同舉江南鄉試明年會試相見於京師既而散去三十一年君始成進士又以候選歸闕二年余參軍事於雲南故君之來而謁選也不復相見顧鬚麋言笑思之若在心目比余乞老歸田而君下世已逾年矣於是嘆遇君之疎知君之淺不得周旋聚處備知君之學術而悉治行之精醇爲可惜也然君選授寧武時同年朱學士筠贈以詩云子學甚醇正子貌頗古雅去作親民官神真跡乃假而蔣某宰馬邑亦贈詩云入境民盡肥視君彌老瘦是君之所以愛民而奉職者可知也已於是仲子兆蓀將大葬於新塘之南阡請爲幽竊之志余奚忍辭據狀君名禮字

行之其先出於五代吉州刺史彭玕祖某由歙遷太倉父某育於其舅吳氏因以爲姓至君通籍後復之君生而樸訥顧聰穎嗜學家多藏書靡不瀏覽弱冠補州庠生潛于進取鄉舉後復以會試中明通榜久之登禮閣故其學益以宏衍深邃旣授寧武知縣地處鴈門極邊風俗鄙陋君擇士之秀異者使訓于鄉人始知慕學而不以強武觸玕文網年餘縣大治君聽訟務開誠勸諭亦工于摘發縣中豪猾廉得之輒痛懲不貸有婦以奸殺其夫詭爲自縊鄉里已結報君反覆研訊得其情置之于法俗祀貓鬼巫者緣以爲利君聞拘猘巫至搜畫像而盡焚之風遂熄某甲毆其父重傷繼又毆斃從父君謂此元惡也不得稽誅立名而杖殺之始以狀聞上官才其斷不罪也然愼于用刑謂人皆有羞恥心一予杖將不

得爲完人適以使其自棄也時巡撫農公起素以仁廉聞嘗
謂僚屬曰古有以經術飾吏事又曰猛以濟寬彭某殆兼之
矣將薦會農公病卒不果君素澹于進取自願年已衰矣遂
引疾力辭以去去官曰士民泣送有越三百餘里而以壺飧
饋者旣歸貧不能自存復請以校官用選潁州府教授四年
卒于官無以爲殯同官爭賙之始得歸柩于家先是君謁選
在京日取諸史傳中循吏故事手自鈔錄或謂古今異宜君
曰吾儕能法古人無在不可施其術安在今不如古耶在寧
武十一年以廉明稱果踐其志而又惜不獲盡伸其志也君
生于康熙某年月日卒于乾隆五十八年某月日年七十有
六著有北窗吟藁金盞倡和諸集配滑氏子三人長兆荃次
兆蓀幼兆蕙而兆蓀最以才學著東南又能經理君之喪葬

可謂賢也已銘曰

敦題之山沿于梁渠其習也醜其秉也愚吹之噓之繫而鋤
之三尾九酌從我趨之雖曰趨之弗竟其撰有書未傳有名
未煥以貽後昆崇其里閭新塘之麋靈長輪灌瘞此貞珉用
俟幽贊

同知署廣西平樂府知府余君墓志銘

士君子之用於世必先觀其器識淵然穆然澄之而不清撓
之而不濁招之而不來麾之而不去然後可以經緯萬端酬
酢百變而有餘然或勿施於用或施於用不克竟其用者比
比也可勝嘆哉若是者今於我友余君庚耦見之君名慶長
號元亭庚耦其字幼敏慧沈靜寡欲年十五爲縣諸生乾隆
庚午舉於鄉壬申會試未第揀發雲南以知縣用補通海縣

三年調太和又六年卑異陞他耶通判旋以病告歸明年病痊赴滇再補維西通判時補甸用兵巡撫檄至永昌在軍需局辦事又三年擢大關同知旋以憂去職服闋時金川方用兵四川總督富公勒渾廣東巡撫李恭毅公湖等奏君諳練軍需請 旨來川補用補成都府同知尋丁母憂總督劉君秉恬等復奏請畱局辦事奏銷畢乃請回籍治葬葬畢引見發廣西以同知用署平樂府知府甫一年因病乞歸歸十五年而歿君在任必以古循良爲法時事悉仿經藝而行之在平樂立諸生爲齋長又嚴保甲之禁以杜奸宄秉性慈良不以苛刻爲能亦不失于寬縱所歷州縣咸有惠政故上官皆服其才生平不以趨走爲長亦不與同僚酒食嬉游以取結納往往危坐竟日喜愠不形於色每事至從容審閱皆能

默識而強記之凡上官遣使問故令書吏抽卷牘以進首尾咸備無一顛倒錯誤時緬甸負固不服大兵分道進討經畧出西路由猛養副將軍出東路由猛密中路則造舟數百浮江而下荊州將軍統兵別駐普洱而偏裨營汛亦數十處又京城八旗兵滿州索倫鄂倫春兵及吉林福建水師湖廣工匠絡繹來滇而牛馬糧餉甲仗火藥銅鐵煤炭之屬各以數萬計相望於道晝夜嘽踈不絕隨至而隨應之君分路設站按站設夫凡百所需咄嗟立辦兵役不戢而自寧羽書旁午如縵絲亂麻觀者心搖目眩君獨不震不驚指揮若定洞中窾要其在四川亦如之此皆予所親見愧以爲不可及也始祖名城明萬歷兵部尚書居歸德高祖考名成龍妣朱氏曾祖考名國佐妣趙氏祖考名秉乾妣周氏考名如陵乾隆戊

午科舉人妣葉氏三代 誥封奉政大夫妣皆 誥封宜人
高祖山商邱遷于湖北遂爲安陸縣人君配劉氏 誥授宜
人子三肇錫選拔貢生歷官長沙府同知次肇翊乙卯科舉
人次肇端監生女三一適福建連江縣知縣雲夢李蕃次適
候選庫大使應山洪萬林次適諸生棗陽孫震甲孫三嗣傳
候選鹽大使次尚伊次若僑孫女一未字曾孫二葆基尚幼
君生于雍正二年十月三十日辰時卒于嘉慶五年正月十
六日辰時年七十有七卽以六年某月日葬于柴家廟之原
君少無宦情其在他郎歸養時家有大樹綠蔭數十畝遂築
室其下匾曰大樹山房旁爲因岡書屋賓月亭香雲閣學舫
濬池累石竹木蓊然又在京師載書數千卷以歸分置其中
俯而讀仰而思賞奇析疑各據其所見以示來學若將終身

焉然則君之出入邊徼羈縻丞倅豈其志之所樂哉所爲詩
文皆誦法古人尤喜崑山顧氏炎武故所作多有相似者而
于宋元經說尤深著有十經攝提易識五翼義階易義初階
易義識疑周書章段春秋比事集訓春秋大義春秋傳辨禮
記通論盤庚淺說月令啓蒙大樹山房文稿壬癸詩鈔登仕
一紀錄未信存逸緬舌編畧墨池紺珠習園叢談德詒堂家
訓凡二十二種總爲五十一卷藏于家君旣歸一年巡撫譚
公尚忠聘主五華書院明年子爲雲南布政司延致賓館爲
予編次銅政全書刪繁訂異有條不紊其後君弟慶遠在予
江西幕府周旋日久故知君性情行事爲最詳昔諸葛忠武
云才須學也學須靜也故澹泊以明志寧靜以致遠今君以
靜制動以簡御繁是以器識之深如此而惜不克竟其用也

每念及之輒爲感悼今君子肇翊質樸能文足蹇四千里至
錢塘余適主講敷文書院索余誌其墓予何敢辭銘曰
不皇皇以競進兮不汲汲以求申其用弗竟兮其德彌淳留
述作兮垂千春柴家原兮五尺墳奠幽宮兮啓仍雲後有餐
風而味道者庶其攷于斯文

廣西蒼梧道周君墓誌銘

昔裘文達公以通才絕識延攬天下士予與諸君重光周君
穉圭皆與公子麟同年因得往來門下而公之愛君也尤甚
凡內廷之著作農部之陳奏皆必屬君書而後入告故公
卿間均重其名先是君考教授公與叔編修公同舉於鄉辛
未編修公會試第一殿試第三人入詞館明年君從兄震
榮登賢書癸酉君與季叔旣濟及兄鼎樞又同舉於鄉而教

授公與君同成進士父子弟兄相繼登科故溯嘉禾文學科名之盛者必以周氏爲首而君之聞望尤著君諱升桓別號山茨穉圭其字世爲浙江嘉善縣人高祖某曾祖某祖某皆耕讀不仕考翼淶以進士官衢州府教授以君貴 賜封中憲大夫妣俱 封恭人君生而敏慧十三能時文十五補縣學生二十一廩於庠乾隆十八年癸酉鄉試中式明年成進士改庶吉士習 國書二十一年丁艱二十四年服闋散館授檢討壬午充順天鄉試同考官取蔣雲師等若干人時稱得士二十八年 大考 欽定一等第二名擢侍講充 武英殿纂修官又 命充 日講起居注官明年補授廣西蒼梧道君素以文學著名旣任監司精專吏治捕積猾獲之貸其餘黨白土司之寃皆爲兩廣總督李公侍堯所稱許旋署

按察使因以知府秦某移獄事獲咎効力阿爾泰軍臺
自京師迤北出張家口至烏里雅蘇臺凡二十四站往來文
報君督蒙古人馳遞之地苦寒黃沙白草絕少人適君處之
怡然日課通鑑及臨摹古帖凡六年如一日也是時妣俞太
夫人年七十有六請於

上得 旨賜歸君旣歸里無以爲家食計四方節鎮風重君
名聘爲書院院長凡歷天津間津揚州安定濟南濰源本郡
駕湖安徽敬敷諸講席所至諸生雲集人人自以爲得師而
節鎮知其明練間亦延入幕中咨以政事或代爲章奏者嘉
慶五年冬江南總督方以鍾山書院相屬而以素患痰疾遂
卒於家君少工書爲庶常時座主錢文敏公愛重與文達公
相等常招至於家故書學文敏以東坡爲法四方人士以綢

素乞書者無虛日長碑短碣得其書寫以爲榮故雖在塞外
而以誌銘請乞者猶相望於道也詩清新婉麗有晚遊詩存
若干卷未刊君生於雍正十一年八月二十二日卒於嘉慶
六年正月十一日壽六十有九夫人姚氏 封恭人先卒子
四長以照候選主簿出嗣君兄鼎樞其次以煥庠生次以輝
候補江南河工通判次以燿附監生君卒後亦歿女四長適
海寧舉人陳緝敬次適候補江南河工同知章光祖次適監
生吳仲增次未字早殤孫四孫女一尚幼以本年十二月日
偕姚恭人合葬於某鄉之某原以照以煥等具行狀來乞銘
嗚呼君與予同舉於鄉同登進士見君才情踴躍謂可從容
展布克盡所長孰意蹶而不復振也俯仰五十年間文達文
敏兩公先後殂謝君之從父諸兄亦皆盡矣同年落落如晨

星而君又下世所以讀君行狀而不禁愴然悲也微以照等
請予亦何忍不銘銘曰

其榮也孰司之其瘁也孰尸之嗟若人至於斯若堂若斧耜
首所依僉謂其後之蕃昌兮我獨懷舊而懸咨